

Dumonda Perl concernent las indemniziuns da las perditas en la cultura

Per mitigiar il donn finanziel pervia da la pandemia ha la Confederaziun decretà il mars 2020 l'Ordinaziun davart COVID-19 cultura e stgaffi uschia la basa per pajar indemniziuns da las perditas en il sector da la cultura. Interpresas culturalas sco er persunas che lavuran sin il champ cultural survegnan damai – sin dumonda – agids finanzials per il donn finanziel ch'è resultà en spezial pervia da l'annullaziun u pervia dal spustament d'occurrentas e da projects ubain pervia da serradas da manaschis, premiss che quest donn saja vegnì chaschunà tras mesiras statalas per cumbatter cunter il coronavirus (COVID-19). Davart las dumondas decidan ils chantuns. La Confederaziun surpiglia la mesadad da las indemniziuns concedidas. L'indemniziun da las perditas cuvra maximalmain 80 pertschient dal donn finanziel. La regulaziun vegn remplazzada l'atun 2020 tras mesiras da la Lescha COVID-19 per il sector da la cultura. En la pratica han manaschis culturalis rendì attent als problems cun l'indemniziun da las perditas, en spezial a la durada da l'elavuraziun da las dumondas sco er a l'atezza dal grad da cuvrida dal donn finanziel.

Las sutsegnadras ed ils sutsegnaders tschentan perquai las suandantas dumondas:

1. Quantas dumondas per indemnisar las perditas èn vegnidas inoltradas al chantun?
2. Quantas indemniziuns da las perditas èn vegnidas pajadas e quant auta è la summa totala da questas indemniziuns?
3. Co ha il chantun applitgà l'atezza da la cuvrida da las singulas indemniziuns da las perditas?
4. Quant svelt ha il chantun pudì elavurar las dumondas correspudentas e pajar las indemniziuns?
5. Co applitgescha il chantun las indemniziuns da las perditas tenor la nova Lescha COVID-19?

Cuira, ils 22 d'october 2020

Perl, Brunold, Thomann-Frank, Baselgia-Brunner, Cahenzli-Philipp, Caviezel (Cuira), Deplazes (Rabius), Derungs, Gartmann-Albin, Hofmann, Horrer, Märchy-Caduff, Müller (Favugn), Preisig, Rettich, Rutishauser, Schwärzel, von Ballmoos, Widmer-Spreiter (Cuira), Wilhelm, Brändli Capaul, Bürgi-Büchel, Giudicetti, Spadarotto, Tomaschett (Cuira)